

2023 Nepomuk Gaschi

I sött durch Chur - s'Masans stohn i im Stau
uf dr Ringstross und bir Kaserna bauens au
trotz füf Stunda Wartezyt han i nu glacht
han halt mit warta no d'Stürerklärig gmacht

Bi üs isch nüt meh mit Party oder Bar
ligsch im Bodmer uf am Gutschi isch jo klar
Hörgrät ab und kraulsch di in da Hosa
au halba taub kasch dr'Sound vom Big Air losa

S'Vreni isch hässig und reagiart nu greizt
16 Grad im Büro - s'wird halt nümma gheizt
uf dr Büaz nu schlofa mit viel Lohn
so sparen miar ir Sinergia Strom

D'WM ohni Tschingga tuat üs Tschutter weh
uf em Flughafa träf i Neuer, Müller und Sané
hallo Katar! als Fän bin i dabi
nu d'Schwoba sind schu uf em Heimwág gsie

An Silvester isches grüan, Kriasi hän schu Blüta dra
i han a T-Shirt und kurzi Hosa a
a Flecka Schnee, acht Meter breit in dr Längi a kli meh
döt han i drei Schwoba - und siba Züzi skifahra gseh

Im Büro muassi früra, mini Lippa sin schu blau,
Energie isch knapp, spara müamer au
suufa Kafi oder Tee, sowitt ischs würggli cho mit miar
as isch fascht wia in Katar - kaina macht sin Job und as gid kai Biar

Ssin Blick isch liecht behämmeret und d'Hoor sind lüchtend rot
weisch nit wär dr Papa isch, denn häsch Not
bim Prinz Harry denki und i blieba au dabie
bir Diana isch dr Ritlehrer – oder sus dr Pumukel gsi

Früaner isch dä mim Längscha - a geila Stecher gsi
doch hüt in dära schräga Zyt isch's verbie
so rechti Männer, guati Böck - gits bald keini meh
und so hät dr Längschi - im Moment dia roti RhB

WM in Katar
jetzt isch si verbi
mit Messi, Modric
schön isch sie jo gsie
doch bitte
liabs Schwyzer Fernseh
bitte, bitte
kei Beni Huggel meh

Bin Pöschtler gsi
mis ganza Läba dur
vu Schlitz zu Schlitz
aimohl quer dur Khur
trinka Moscht und
Dünnpfiff isch dr Lohn
mit viarasibzig
schaffts au dr Charles ufa Thron

As häd si schu immer geh, dia ganz speziella Lüüt
i maina wia d Uriella, dr Geller oder d'Wetterschmöcker hüt
zum a Wetterschmöcker werda machsch a riesa Prozedur
und doch isches aifacher als mim Auto quer dur Khur

Alli jommerend nu uma wäga da Triebstoffpriisa
trotzdem kriagi jeda Sunntigobet grad a riisa Kriisa
alli Unterländer wo bi üs wend öppis schöns erleba
würden sich gschieder am Fritigobet s'Züri uf Strossa kleba

Körper liggen uma - as tuat diar weh
zwüsche Trümmer, Scherba kasch dia döta gseh
gseht us wia Kriag – und das macht miar Müah
as isch s Welschdörfli am Samstigmorga fräh

Im Blue Cinema erlebsch dia Film wia echt
das 4-D-Kino isch wirkli nit so schlecht
dia Spezialeffekt im Film - das ischs Gwürz
jetzt schmecksch sogar am Brad Pitt sini Fürz